

Iepazīsimies ar deputātu

Šajā numurā – intervija ar novada domes deputātu VALDI LABINSKI (Latvijas Reģionu Apvienība).



Īsumā pastāstiet par sevi

Byut latvišam un katolam – daudzim tys ir kas pats par sevi saprūtam, bet na maņ. Agrāk Vocijas trymdā latvišu jaunišu draugi jūkōdamis vaicōja: voi tu lobōk draudzātūs ar latvīti komunisti, voi krivīti – katolīti, un es atbiļdēju, ka tod jau lobōk ar pādejū, viņ krīvu katōļu tikpat kai nav, bet boltkrīvi, tys gon reali. Tūreiz tī beja jūki, bet dzeive īsakōrtōja tai, ka šudin maņ ir rodi kai Vōcejā, tai ari Boltkrīvejā.

Asmu dzimis 1957. godā Sibīrē, muni vacoki beja 1941. godā deportātais policists Vitālijs Labinskis un 1948. godā izsyuteitō Lītovas vōcite Gertrūde Gyszās. Obi niu jau dus Upinīku kopūs. Muna mōsa dzeivoj Reigā, un nu mōtes pyrmōs lauleibas – brōls i mōsa Vōcijā. Nu Sibīres mes pi tāva mōtes Jersikā īsarodom 1958. godā. Leivōnūs es sōku skūlas gaitas, bet 1966. godā saime izceļōja iz Vōciju, kur četrus godus vuicejūs vōčišu skūlōs, tod Minsteres Latvišu gimnazejā (MLG), tū absolvejūt 1978. godā. Sōku vēstures, geografijas un baltu volūdu studejas, bet, tōs napabeidzis, 1982. godā klīvu ASV radio stacejas „Breivō Eiropa” leidzstrōdnīks. Dorbā mani pījēme, lai veidōtu programu „Latgolas Bolss”, 24 godu vacumā tod ari apgīvu latgališu volūdu, un Minhenē izaveidōja sadarbība ar legendarū latgališu grōmotu izdevēju Vl. Lōci.

Jau skūlā sōku raksteit presē un kai leidzpōrvaldes lūceklis īgōju sabīdriskajā dorbā. Pa laikam beju aktīvs septepōs, ostopōs latvišu un storptautiskōs organizacijōs. 80. godūs tyku īvalāts VFR latvišu centralajā organizacijā, kur mes (21 lūceklis) pōrstōvējom 10.0000 tautīšu. Tūreiz beju atbiļdeigs par īškejōs informācijas dorbu un vālōk – revīziju. Treis godus vadeju Eiropas Latvišu Jaunatnes apvīneibu, beju rītumūs Latvišu Katōļu Studentu un Akademiku apvīneibas „Dzintars” prezidents, vālōk treis termīnus itūs pīnōkumus pīldeju ari Latvijā. 1995. godā dorba vīta pōrsacēle iz Prāgu, un itymā godā mes ar Žannu sasa-

laulōjom. Myusu saimē tagad ir pīci bārni. Ap 2000. godu vadeju „Radio Free Europe / Radio Liberty” biroju Reigā, tod atsagrīžu Prāgā un pēc latvišu redakcijas slēgšonas 2004. godā pōrsacēlem iz myusu sātu Daugovas krostūs. 2006. godā nūdybynōju „Latgales Radio”, kuru „Traknūs godu” beigōs beja jōpōrdūd. Niu veicu administrativus dorbis Medicinas centrā “Saule”, pīsadolu picūs NVO dorbūs, te pīminēšu Nacionalūs Elektroniskūs Plašsaziņas Leidzekļu Padūmi, kur asmu Sabīdriski Konsultativōs padūmes lūceklis, pōrstōvūt „Dzintaru”, un asmu ari deputats.

Kāpēc nolēmāt piedalīties vēlēšanās?

Kod vadeju „Latgales Radio”, Leivōnu nūvoda dūmes prišksādātōjs aicynōja mani startēt jō Tautas partijas sarokstā. Atsasaceju interešu konfliktu deļ un nabeja ari laika, jo beja kotru dīnu jōbrauc iz Rēzekni. Kod dorbs radio nūsaslēdze, situacija izamaīneja. Ar “Traknūs godu sludynōtōjim” maņ nabeja pa ceļam, pamēginōju ar Saskaņas Centru, kurs iz breidi beja it kai socialdemokratīks, bet kliudejūs. Vālōk īsastōju Zatlera Reformu partijā – cytōs partijōs tai ari naasmu



■ Leivōnūs Dubnas krostā 1964. godā ar draugu un mōsu

bejis. Te traucēja liberalistiska grupēņa, kura Latgolā būjōja rezultatus kai Saeimas tai pošvaldeibu vēlēšōnōs. Tymā laikā nūsadybynōja sadarbība ar latgališu patriotu Juri Viļumu, vālōk kai Saeimas deputats jis pīsavīnōja Latvijas Reģionu Apvīneibai, un 2017. godā es sekōju jō aicynōjumam Leivōnūs veidōt sarokstu. Izarōda, ka itei izvēle ir bejuse lobōkō, jo itūreiz īdzeivōtōji īvēlēja myusus divus: Aini Veiguru un ari es pyrmū reizi klīvu par Leivōnu nūvoda deputatu.

Kādas rakstura īpašības Jums piemīt? Kāds ir Jūsu dzīves moto?

Dzeives laikā prioritātes mainīs. Tūmār kaut kas ir bejis nūtureigs, par tū licynoj jau Leivōnu vydusskūlas 1965./66. goda pyrmōs klases liceiba. Skūlōtōjas maņ tūreiz beja klases bīdra Jura Kulakova mōte un B. Stare. Liceiba taida, kai jau puikam, bet uzvedēibā un kōrteibā tikai vīni pīcinīki. Partū es ari tagad soku: kōrteibai jōbyut!

Kādi ir Jūsu vaļasprieki?

Kod dzeivōju ōrzemēs, tod pa lelom pīlsātom viņ. Partū breivōkūs breižūs gribējōs byut pi dobas kryuts. Atvalīnōjumūs, sabīdriskajā dorbā un dorba komandējumūs izbraukōju pusi Eiropas, vairōkkōrt beju ASV un Kanadā, tai ka muna ceļōtkōre ir apmīrynōta. Tagad maņ ir baida pa sātas lūgu pasavērt iz dobu, vysod maīneigū Daugovu, vosorā jū pōrbriest. Sasaglobōjuse interese par vēsturi un memuaru laseišōnu. Jauneibas aizaraušōna – zynōtniskō fantastika – ari vēļ pateik, bet riteņbraukšōna (asmu tai bejs Anglijā un Francijā), futbols un kora dzīdōšōna niu pīder pagōtnei.



■ Lelbritanijā, latvišu eipašumā „Straumēni” 1981. godā rītumu pasaulā latvišu jaunišu kongresa prezidijā: nu lobōs E. Levits (tagad Eiropas Cylvāktīseibu tīsas tīsnesis), ASV latvišu pōrstōve un V. Labinskis

Kā Jūs vērtējat Līvānu novada attīstību?

Leivōnu nūvods ir muna seņču zeme, te bērneibā nūdzeivōju 8 godus un niu jau otkon 14 godus, nikur cytur naasmu bejis tik ilgi. Deļtō maņ ir svareigi, kas ite nūteik, un lai atteisteiba byutu taida, ka ite byutu vīta ari myusu bārnim. Tūmār mes pošlaik nūdzeivōjam sovu bārnu un mozbārnu nōkūtni. Tōdēļ dūmes sēdēs bolsōšu pret izškērdeibu, jo mums vajadzeigs kotrs eiro atteisteibai. Leivōnu nūvods, taipat kai lela daļa Latvijas, ir iz napareizō ceļa. Zeme izatukšoj un pītryukst drūsmeigas, iz nōkūtnes atteisteibu orientātas darbeibas. Vēļ myusus glōb Eiropas Savīneibas nauda, bet desmit godu tei tyka navys īguldeita atteisteibā, bet vīnkōrši „apgūta”. Sacalti Tautas nomi, kur vairs nav tautas, sytylnōtas skūlas, kuras teik slāgtas, atbalsteitas aktivitātes, kuras roda jaunus izdavumus. Jaunōkais pīmārs ir dōrgais gaisa tylts pōri dzelžceļam. Vēļ nav likvydāts agrōk saimnīciski vajadzeigais gaisa tylts pōri Reigas īlai, un voi ite nōkūtnē nabyus leidzeigi? Maņ gon nav gryuši 300 metrus aizīt leidz dzelžceļa pōrejai. Svareigōk byutu, lai automašynu transports breivī varātu škārsōt dzelžceļu, tod byutu vysmoz dagvīlas un laika ekonomeja.

Kuras ir tās jomas novadā, kurām Jūs, būdams deputāts, gribētu īpaši pievērsties?

Faktiski asmu opozīcijas deputats, taidi mes asom četri nu 15. Muns dorbs ir runōt par tū, kas myusim ir vēļ doroms. Ka pošvaldeibā nabyus īškejōs kritikas, nabyus bremžu – tod mes ībrauksim pavysam grōvī. Dūmes sēdēs pēc prišksādātōja es asmu aktivōkais runōtōjs. Ceru, ka munai runōšanai un īsnīgumu raksteišōnai byus ari kaidi panōkumi, ka tei nabyus viņ tukša mutes dzysynōšōna. Ka es byutu pi lemšōnas, munas prioritātes byutu ražōšōnas atteisteiba un vēsturiskō montōjuma saglobōšōna.

Ar ko Jūs lepojaties Līvānu novadā?

Leivōnu nūvodā meklejami Latvijas vaļstiskuma un latvišu nacijas pyrmsōkumi – ite beja latgaļu cilts centrs Jersika, bet latgali ir myusu tautas pamats. Tōdēļ asmu lapns, ka muni seņči ite dzeivōjuši, ka es pats dzeivoju ar skotu iz Jersikas pīlskolnu un pōri Daugovai varu saredzēt Dignājas pīlskolnu. Asmu lapns, ka Jersikas Vysvalds, kai vīneigais nu senejūs Latvijas cilšu vadeitōju, tyka saukts latiniski par rex (karaļs), asmu lapns, ka pyrms ostopu godu symtu jō valdejumā beja teritorijas myusdīnu Dānijas voi Šveices lelumā. Tys pīrōda, ka mes asom gona leli, ar sovu vēsturi un nav mums kō beitis ari nu nōkūtnes.

Mani īprīcynoj, ka Latvijā skūlāni vēstures stupdēs dzied Jersikas vōrdu, ka Jersikas pīlskolns kai stōvējis tai stōv, un prīcēs ari nōkūšōs paaudzes. Maņ priks, ka myusu nūvodā ir vysu lelūs kristeigūs konfesiju dīvnomi, maņ priks, ka pi myusu ir vīneigō dzelža bazneica Latvijā, kai liceiba tam, ka itamā Latvijas daļā kristīteiba vysilgōk napōrtraukti ir veidōjuse cylvāku priškstotu par Dīvu un pasauli, un maņ priks, ka nūvodā daudzvīt dzērd myusu senejū volūdu – partū ari es ite rokstu latgaliski.



■ MLG 1978. goda izlaiduma daļa absolventu: nu kreisōs I. Sāmīte (vālōk Latvijas finansu ministrē), K. Streips (TV personeiba), R. Rušīņa, V. Labinskis un divi klases bīdri nu Vocijas



■ Radio „Breivō Eiropa” studijā Prāgā 90. godu beigēs, pyrmais nu kreisōs vālōkais Kurzemes luterāņu veiskups P. Brūvers, radio koleģi un lobajā pusē V. Labinskis